



15. decembari 2022

Inatsisartut ingerlatsinermut maleruagassaanni § 37 imm. 1 tunngavigalugu Naalakkersuisunut ukuningga apeqquteqaateqarpunga:

Naalakkersuisunut apeqquteqaatit:

1. Nunatsinni kræfterlutik katsorsartittut Danmark-misut kræfterlutik katsorsartittut assinganik katsorsartinnissaminik periarfissaanik Naalakkersuisut suliniutigut qanoq qulakkeerniarpaat?
 - a. Katsorsartinnissamut periarfissani misiliutaasumik katsorsaanerit ilaappat?
 - b. Kalaallit kræftimik katsorsartittunut katsorsaariaatsit suut atussaneraat kiap aaliangissavaa?
2. Suna tunngavigalugu annertunerusumik katsorsarneqartussatut neqeroorfigittarneq Tulleriissaarisarnermut ataatsimiitsitaliaq avaqqullugu ingerlanneqarnissaa Naalakkersuisut aaliangsimappat?
 - a. Tamatumani katsorsarneqarnissamut neqeroorfigineqarnissaq nakorsat ataasiakkaani eqqoriaanikkut tunngaveqarluni isikkoqassappat, katsorsarneqarnissamut assigiimmik periarfissaqarnissaq Naalakkersuisut qanoq qulakkiissavaat?
3. Siornatigut Aningaasanut Inatsi immikkut konto pingaarnermik peqartarpoq (34.11.06) misileraalluni katsorsaansamut. Eqqortumik paasineqassava konto pingaarneq taanna konto pingaarnep 34.11.01 ataanut inissineqarsimanera, Nunani allani napparsimasunik katsorsaasarneq?
 - a. Konto pingaarnermi tassani misileraatigalugu katsorsaasarnermut ukiuni tallimani kingullerni aningaasat qanoq annertutigisut atorneqarsimappat?
 - b. Kræftimut katsorsarneqarnissamut periarfissat konto pingaarnermi 34.11.01 ataani periarfissaasunut sutigut allaaneruppat?
4. Kræftimut katsorsarneqarsinnaanerit periarfissatigut amerlinerisa kingunerisaanik nunatsinni nakorsanik peqqissaasunillu amerlanerusunik atorfinitsitsinissamut pisariaqartitsilernissaa Naalakkersuisut naatsorsuutigaat?
 - a. Taamaappat; Nakorsat peqqissaasullu immikkut piginnaasaat sorliit atuutissappat?
 - i. Atorfinitsitsinerit qanoq qulakkeerneqassappat?
5. Kalaallit kræfterlutik napparsimasut Danmarkimi katsorsarneqarnerat aaliangerneqarpat Rigshospitalimiinngitsoq kisiannili allani katsorsarneqarnissaat Naalakkersuisut naatsorsuutigaat?
 - a. Taamaappat; Napparsimasut sumi najugaqarnissaat Naalakkersuisut naatsorsuutigaat?
6. Danmarkimi katsorsaariaatsit neqeroorutigineqartartut, nunatsinniillu kræfterlutik katsorsartikkiartortussanut neqeroorutigineqartartussat, qanoq sivistigisumik utaqqisoqarnersut misissornissaat anguniarlugu danskit oqartussaarfii Naalakkersuisunit attavigineqarnikuunerlutik?



7. Pineqartumut Naalackersuisut allanik paasissutissiisinaanerlutik?

(Inatsisartunut ilaasortaq Anna Wangenheim, Demokraatit)

Tungavilersuut

Danmarkimi kræftertut katsorsarneqartarnerat assigalugit nunatsinni kræftertut katsorsarneqartalernissaat Demokraatiniit pissusissamisoorsoraarput. Kisiannili suliniutitigut aammalu peqqinnissaqarfimmi aqqissuussaanikkut qanoq assigiimmik periarfissaqartitsinissamut Naalackersuisut atuutilersitsinissaat takujuminaatsippara.

Imaassanngimmammi nakorsaq sorleq iserfiginerlugu apequtaalluni katsorsarneqarnissaq pituttorsimaffigineqartalissappat. Siornatigut Tulleriissaarisarnikkut ataatsimiitsitaliaq aqqutigalugu suut katsorsarneqarsinnaanerata aaliangersorneqartarnikuupput, tamannalu kræfterlutik napparsimasut assigiimmik periarfissaqartitaanerannik isumaqarluni.

Taasumap avataasigut takujuminaatsippara ilumut periarfissatigut nutaaliortoqarnerseq imaluunniit periarfissaajuaannarsimagaluartoq kisiannili aaliangersaasarnikkut oqartussaaneq nuuinnarneqarnerseq.

Taakku apequtinut tungavilersuutaapput, ullullu qulit suliffiusut iluanni akineqareersimanissaat kissaatigaara.